



Lescha davart las ordinaziuns da traffic ed il parcar dalla vischnaunca Ilanz/Glion (Lescha da traffic; Ltr)

dils nunenconuschent (versiun dils nunenconuschent)

Il parlament communal dad Ilanz/Glion,

sebasond sin art. 35 lit. a dalla constituziun communalada dad Ilanz/Glion (CC; LIG 11.1) e sin art. 7 dalla lescha introductiva dil cantun tier la lescha federala davart il traffic sin via (DG 870.100), suenter envesta el messadi dalla suprapostanza communalada dils 23 d'uost 2022,

decida:

I. Disposiziuns generalas

Art. 1 Object

¹ Quella lescha reglescha ils principis e las competenzas pertuccont la regulaziun e la signalisaziun dil traffic local ed il parcar public.

² Il diever cun vehichels da vias d'alp, da funs e d'uual ei reglaus ella lescha da carrar sin vias da funs.¹⁾

¹⁾ LIG 74.2

II. Prescripziuns dalla polizia stradala e dalla polizia da traffic

Art. 2 Disposiziuns da traffic tenor lescha davart il traffic sin via¹⁾

¹ La vischnaunca ei el rom dalla legislaziun surordinada competenta per la regulaziun e la signalisaziun dil traffic local tenor art. 7 dalla lescha introductiva tier la lescha federala davart il traffic sin via.²⁾ En special eis ei caussa dalla vischnaunca:

- a. da relaschar per singulas vias e plazzas scamonds da carrar e dad ir a cavagl e da signalisar vias a direcziun unica;
- b. da signalisar vias dad ir cun velo e dad ir a cavagl;
- c. da schar reglar il traffic sin via cun amplas ni auters indrezs;
- d. d'introducir l'obligaziun da pagar taxas per il diever da parcadis.

Art. 3 Regulaziuns excepziunalas

¹ La vischnaunca sa annullar temporarmein las restricziuns da parcar en cass dad occurrenzas specialas. Per il medem motiv sa ella era relaschar scamonds da parcar temporars.

² Sch'igl ei pusseivel da trascargar rauba, prestar survetschs, exequir lavurs da baghegiar ed auter mo sin parcadis da cuoz da parcar limitau ni mo ordeifer parcadis marcai, sa la vischnaunca metter a disposiziun ina carta da parcar taxabla per in temps limitau che lubescha da surpassar il cuoz da parcar maximal resp. da parcar ordeifer ils parcadis marcai.

Art. 4 Allontanar vehichels

¹ Vehichels plazzai aschia ch'els impedeschan il traffic sa la vischnaunca schar allontanar sin cuost dil possessur ni utilisader responsabel, sche quel sa buca vegnir contonschius a temps util ed igl impediment caschuna in prighel per auters utilisaders dalla via ni sch'in trapass ni la rumida da neiv vegnan grevegiai.

¹⁾ Lescha davart il traffic sin via (LTV; CS 741.01)

²⁾ Lescha introductiva tier la lescha federala davart il traffic sin via (LitLTV; DG 870.100)

III. Parcar sin parcadis publics

Art. 5 Parcadis publics

¹ Sco parcadis publics valan surfatschas signalisadas resp. marcadas ch'ein accessiblas en general per vehichels motorisai sin vias e plazzas publicas sco era sin schischoms en possess dalla vischnaunca resp. per ils quals la vischnaunca ha ils dretgs d'utilisaziun corrispundents.

Art. 6 Finamiras dil parcar sin parcadis publics

¹ En connex cun la gestiun da parcadis ha la vischnaunca las finamiras suandontas:

- a. metter a disposiziun ed occupar ils parcadis tenor lur intent;
- b. risguardar meglier il principi dil caschunader arisguard il parcar public.

Art. 7 Scamond da parcar general

¹ La suprastonza communal sa relaschar zonas cun in scamond da parcar.

² Ordeifer il territori da habitar eis ei lubiu da parcar el spazi da vias public, aschilunsch ch'il traffic vegn buca restrenschius.

Art. 8 Taxas da diever

¹ Il parcar sin terren public enteifer il territori da habitar ei da principi suttamess a taxas.

² Il temps suttamess a taxas cuoza da principi da gliendisdis tochen dumengia dallas 07.00 allas 19.00.

³ La taxa da diever importa denter:

- a. 0.50 e 2.00 francs l'ura;
- b. 5.00 e 20 francs per jamna;
- c. 20 e 150 francs il meins;
- d. 200 e 1'200 francs igl onn.

⁴ La vischnaunca sa:

- a. desister cumpletamein ni parzialmein d'incassar taxas per parcadis publics meins attractivs, e quei cun (zona blaua) ni senza restricziun dil cuoz;

-
- b. far ulteriuras excepziuns temporaras, localas e/ni persunalas dall'obligaziun da pagar taxas;
 - c. limitar il parcar permanent regular da di e da notg a certas gruppas da personas, certs intents, certs loghens ni certas grondezias da vehichels;
 - d. desister d'incassar taxas per las empremas 15 tochen 60 minutas sco era sur miezdi per parcadis damaneivel da menaschis commercials ed industrials cun igl intent da promover la gastronomia, il commerci ed il mistregn.

IV. Campar

Art. 9 Campar

¹ Il campar ei sebasond sin la lescha da polizia¹⁾ lubius mo en zonas designadas.

² Per plazs da campar che vegnan purschi ni administrai dalla vischnaunca sa vegnir incassau ina taxa.

³ Ei valan las disposiziuns da diever dils plazs da campar relaschadas dalla vischnaunca.

V. Utilisaziun exclusiva da parcadis

Art. 10 Principi

¹ La vischnaunca sa surschar parcadis publics dalla facultad administrativa a personas privatas encunter pagament per l'utilisaziun exclusiva. Ei dat negina pretensiun legala che concedess in tal dretg d'utilisaziun.

Art. 11 Taxa

¹ La taxa ch'ei da pagar ordavon per l'utilisaziun exclusiva importa frs. 50.00 tochen frs. 150.00 il meins per in parcadi en ina garascha sutterrana e frs. 30.00 tochen frs. 100.00 il meins per in parcadi ordaviert.

² La taxa concreta ei da fixar ell'ordinaziun el rom dils prezis usitai el liug. Eventuals augments dallas taxas ein da comunicar individualmein als utilisaders dils parcadis sil pli pauc quater jamnas avon l'entrada en vigur.

¹⁾LIG 41.1

Art. 12 Visada

¹ Sche la cuvegna davart l'utilisaziun vegn concludida per in temps nondeterminau, sa mintga partida visar ella senza cundiziuns risguardond in termin d'in meins mintgamai per la fin dil meins.

² Per motivs impurtonts sco per exempel il diever d'ina garascha sutterrana sco implont per la protecziun civila sa la cuvegna vegnir visada da tut temps senza risguardar termins.

VI. Finanzas**Art. 13** Utilisaziun dallas taxas

¹ Las entradas dallas taxas per parcadis vegnan impundidas per mantener e gestiunar ils parcadis.

² In surpli restont dallas taxas per parcadis vegn impundius per augmentar la purschida da parcadis publics sin terren public e per migliurar l'infrastructura per il traffic.

VII. Execuziun**Art. 14** Suprastonza communal

¹ La suprastonza communal ei en special cumpetenta per la regulaziun e la signalisaziun dil traffic local tenor art. 1 e 2 da quella lescha el rom dallas disposiziuns da traffic.

² Ella reglescha el rom digl art. 2 da quella lescha cunzun:

- a. tgei surfatschas che vegnan utilisadas sco parcadis publics e lur attribuziun alla categoria da parcadi correspondent;
- b. las restricziuns dil cuoz da parcar;
- c. las premissas persunalas e/ni materialas per il parcar permanent ed ils parcadis che stattan a disposiziun per quei intent.

³ La suprastonza communal relai in'ordinaziun per l'execuziun da quella lescha. Ella sa surdar la cumpetenza executiva alla direcziun communal.

⁴ Suenther che l'autorità cantunala ha approbau la mesira, publichescha la vischnaunca quella cun la pusseivladad per la populaziun da prender posiziun enteifer 30 dis. Suenther l'examinaziun e la purificaziun dallas posiziuns entradas decida la suprastanza communal, sche las mesiras duein vegnir realisadas ni buc. Il conclus davart l'introducziun d'ina mesira sto la vischnaunca publicar tenor art. 107 al. 1 dall'ordinaziun davart la signalisaziun dallas vias.¹⁾

VIII. Responsablada

Art. 15 Responsablada da proprietaris dad ovras

¹ En cass da donnis ni d'accidents ei il proprietari da vias responsabels mo el rom dalla responsablada da proprietaris dad ovras (art. 58 DO).

IX. Disposiziuns penals

Art. 16 Disposiziun penala e rom penal

¹ Tgi che violescha intenziunadamein ni per malprecauziun las disposiziuns da quella lescha ni riguarda buca las disposiziuns che sebasan sin ella, vegn castigias cun ina multa da tochen 5'000 francs. En cass levs sa in'admoniziun a bucca ni en scret vegnir pronunziada ni ch'ei vegn renunziad ad in castitg. Resalvadas restan las disposiziuns penals dil cantun e dalla confederaziun.

² A tgi che fa maldiever d'ina lubientscha da parcar sa quella vegnir retratga permanentamein ni temporarmein.

Art. 17 Procedura administrativa ordinaria

¹ La cumpetenzza e la procedura sedrezzan tenor art. 35 e 36 dalla lescha da polizia dalla vischnaunca Ilanz/Glion.²⁾

¹⁾ Ordinaziun davart la signalisaziun dallas vias (OSV; CS 714.21)

²⁾ LIG 41.1

Art. 18 Multas disciplinaras

¹ Surpassaments dallas prescripziuns tenor quella lescha e l'ordinaziun respectiva vegnan castigai dalla polizia communal ni da funcziunaris communal analog alla legislaziun davart las multas disciplinaras dalla confederaziun.

² La suprastanza communal sa relaschar leutier subsidiarmein, analog agl art. 37 dalla lescha da polizia¹⁾, ina gliesta da surpassaments che san vegnir castigai cun multas disciplinaras da tochen 500 francs.

X. Mieds legals**Art. 19** Recuors

¹ Encunter tut las disposiziuns cun excepziun da proceduras tenor l'ordinaziun davart las multas disciplinaras²⁾ sa vegnir fatg recuors enteifer 30 dis dalla suprastanza communal. Il recuors sto cuntener ina proposta, ils fatgs cun ils mussaments ed ina motivaziun.

² Decisiuns dalla suprastanza communal san vegnir contestadas enteifer 30 dis dapi la consigna cun recuors alla dertgira administrativa.

XI. Disposiziuns finalas**Art. 20** Entrada en vigur

¹ La lescha presenta ei suttamessa al referendum facultativ.

² La suprastanza communal decida, cura che la lescha entra en vigur.³⁾

³ Cun l'entrada en vigur dalla lescha ein las disposiziuns d'auters decrets che stattan en cuntradicziun cun ella abrogadas.

¹⁾ LIG 41.1

²⁾ Ordinaziun davart las multas disciplinaras (OMD; CS 314.1)

³⁾ Mess en vigur sils xx-xx-2023 cun decisiun dalla suprastanza communal dils xx-xx-2022.

Tabella dallas modificaziuns - tenor conclus

Data dal conclus	Entrada en vigur	Element	Modificaziun	Publicaziun CRS
negina indicaziun	negina indicaziun	relasch	emprema versiun	-

Tabella dallas modificaziuns - tenor element

Element	Data dal conclus	Entrada en vigur	Modificaziun	Publicaziun CRS
relasch	negina indicaziun	negina indicaziun	emprema versiun	-